

# Carta chí uni nacahyí Juan nuú na cúú cuéntá Jesús

---

## Cáhan Ndióxi Juan xihín in da naní Gayo

<sup>1</sup>Yehe cúú u in da sacuaha ta cáhyí i carta yóho nu mún ñani máni, da naní Gayo. Ta mé a ndaa quíhvi ndusa ini i yohó.

<sup>2</sup>Candehé, ñani máni, da cúú cuéntá Jesús. Xíca tahvi i nu Ndióxi ña ná quiahva mé á tá nuú ña vaha nuun. Ta ná caja mé á ña ná a quíhvun ta já coo vaha inún tá quiahva ín vaha inún xihín Ndióxi. <sup>3</sup>A juú quiahva ná cajii íni i tá naquixi java na cúú cuéntá Jesús yóho ta nandicani na nuú i ña co cáxoun nuú ña ndaa jáchi cája tá cájún ña. <sup>4</sup>A juú quiahva cájii íni i tá ñéhe e tuhun ña xíca ndó íchi cuéntá ña ndaa jáchi mé ndó cúú ndó tátuhun jahyi i.

<sup>5</sup>Candehé, ñani máni. Vaha ndivaha cájún jáchi xihín ndinuhu inún chindeún na cúú cuéntá Jesús tá saa na jan vatí cúú ná na quíxi ñuu tóho.

<sup>6</sup>Ta nu tócó ndihi na tácá veñuhu yóho ndícani mé na tóho ndá quiahva quíhvi ndivaha inún na. Ña cán quéa xíca i ñamaní nu yohó, Gayo ña ná chindeún na tá ná saa tucu na cán ta ná quiahvún ña ndímaní nu ná cañehe na íchi cuhun na jáchi ña yóho cúú á ña cájii ini Ndióxi xihín.

<sup>7</sup>Ndítahan chindeún na jáchi naqueta na xíca nuu na cája na chuun cuéntá Jesucristo ta co cúni na caca na ñaha catacu na nuú na co cúú cuéntá Jesús. <sup>8</sup>Sahá ña cán quéa ndítahan nu mí, na cúú cuéntá Jesús chindeé yó na cán xihín ña ndímaní nu ná. Ta xihín ña yóho in nduu yó xihín ná tá cáhan na ña ndaa xihín ñayivi.

## Cuachi cája in da naní Diótfes

<sup>9</sup>Sa nachindahá i in carta nu tócó ndihi na cúú cuéntá Jesús ndúu jan joo Diótfes coó naxeen da cándúsa da ña cáchí nde. Jáchi cája cáhnu da mé dá ta cúni da cacuu da jíni nu tócó ndihi na cúú cuéntá Jesús ndúu jan.

<sup>10</sup>Sahá ña cán quéa tá ná saa i jan caxi tuhun i nuun sahá ña cája da jáchi xíca nuu da cáhan ndivaha da ña tuhun sahá nde. Ta a juú ña yóho cuití cája da, vaha jáchi ni co cúni da ndiquehe da na cúú cuéntá Jesús xínu coo

### 3 JUAN

jan. Ta sájí nuu da nuú na cúni ndiquehe vaha ñahá ta janda táxí da na veñuhu.

<sup>11</sup>Candehé, ñani máni. A cajún ña núu tá quiahva cája Diótrefes jan. Xíní ñúhú cajún ndinuhu ña vaha jáchi da cája ña vaha cúu dá cuéntá Ndióxi joo da cája quini co xíní da Ndióxi.

#### Ña vaha cája Demetrio

<sup>12</sup>Joo tóco ndihi na cúu cuéntá Jesús cáhan vaha na sahá da naní Demetrio jáchi ña ndaa cuití va cája da. Ta quiahva já cáhan vaha ri ndehe va sahá dá ta cándaa inún ña cáhan nde ña ndaa.

#### Ndíndayí Juan Gayo

<sup>13</sup>Mé a ndaa íin cuahá ndivaha ñaha cúni cáhan i xuhun joo co cúni cahyí i ña nuú tutu yóho <sup>14</sup>jáchi cúni cuni yachi i yohó já ná nditúhún yúhu mí i xuhun.

<sup>15</sup>Ña xíca i nu Ndióxi quéa ná caja mé á ña ná coo vaha inún. Na cúu cuéntá Jesús ndúu yóho chindahá na Ndióxi coún. Ta cajún ñamaní cáhan Ndióxi lohún xihín in in na cúu cuéntá Jesús ndúu jan.